

Las lecziuns cumenzan puspè

Curs da rumantsch per uffants a Turitg e Basilea

■ (cp) Sin iniziativa da la Quarta Lingua (QL) e da la Lia Rumantscha (LR) pon uffants rumantschs dal chantun Turitg e conturn vischin puspè frequentar durant l'onn da scola 2015/16 lecziuns da rumantsch. Er a Basilea cuntinuesch'ins cun il curs facultativ per uffants cun ragischs rumantschas.

Gia per la segunda giada han uffants turitgais da geniturs rumantschs la pussaivladad da s'approfundar en la lingua da lur mamma u da lur bab. Il curs vegn pussibilità da la QL, da la LR e dal fondo da lottaria dal chantun da Turitg. Durant duas lecziuns per emna pon uffants emprender rumantsch e megliar lur enconuschientschas e quai a moda ludica e confurma al stgalm. Las personas d'instrucziun instrueschan en lur idiom. La lecziun cumenza e finescha adina en la gruppa gronda. Tranteren lavuran ils uffants tenor differents temas en gruppas pli pitschnas. Il curs da lingua e cultura ha lieu complementarmain a l'instrucziun da scola mintgamai la mesemna da las 14.30 fin las 16.15 en la chasa da scola Hirschengraben al Hirschengraben 46 ad 8001 Turitg (stanza 408). Las personas d'instrucziun èn da lingua materna rumantscha ed èn scolasts primars, scolasts da gimnasi e/u scolasts da linguas. L'onn da curs 2015/16 cumenza ils 2 da settember 2015. Ad interim èsi pussaivel da tut temp d'entschaiver cun il curs. In onn da curs custa 100 francs per uffant.

Geniturs/uffants pon prender part ad in'ura d'emprova.

Il project da pilot a Basilea cuntinuescha

Grazia al success dal project da pilot «curs facultativ rumantsch» l'onn da scola 2014/15 pon er ils uffants da Basilea-Citad cumenzar cun il segund onn da scola. Ver 10 scolaras e scolaras da 7 fin 12 onns frequentan dapi ils 22 d'avust 2015 la sonda damaun tranter las 10 e las 12 en la chasa da scola Wasgenring a Basilea l'instrucziun da rumantsch tar *Simon Lombris* (scolast a la scola reala a Möhlin). Il curs vegn purtà da l'uniun «Scola rumantscha Basilea» cun sustegn dal departament d'educaziun dal chantun da Basilea-Citad, da la LR e da l'Uffizi federal da cultura e la promoziun da linguas dal chantun Grischun ed ina contribuziun unica da la Banca chantunala grischuna. Il curs è gratuit. Geniturs/uffants interessads pon frequentar ina lecziun d'emprova. Per dumondas per lecziuns d'emprova ed ulteriuras infurmaziuns As drizzai a: barbaraalder@bluewin.ch ubain a:

uffants@rumantsch.ch

Annunzia Turitg

Plan da situaziun – chasa da scola Hirschengraben Turitg

Annunzia Basilea

Plan da situaziun – chasa da scola Wasgenring Basilea



Las lecziuns da rumantsch per uffants a Turitg e Basilea han success.